

CiU TRÒBE "POSITIU" QUE I AGE OBSERVADORS DERA ONU EN EUSKADI

Eth dirigent de CiU, Joaquim Molins, considerèc "positiua" era prepausa des partits signanti der Acòrd d'Estelha entà qu'observaires dera ONU vagen tà Euskadi entà hèr un seguiment deth procès de patz e critiquèc que "se demonise" ath PNB per uns plantejaments que ja formulèc era socialista Rosa Díez.

Molins assegurèc, en ròda de premsa en Barcelona, qu'era prepausa d'enviar observadors internacionaus entà seguir eth procès de pacificacion basic "gosaria dèder qu'ei positiua, pr'amor qu'ac plantegen tant es partits nacionalistes com eth PSOE".

Eth dirigent nacionalista catalan se planh de qu'ara tant eth PP com eth PSOE censuren era prepausa, quan gessec dera deputada socialista Rosa Díez e, en sòn moment, "inclús recebec comentaris laudatòris". "Aquesta politica de demonisar tot çò que hè eth PNB, de possà-lo entara paret ei plan enganhada, ei un grèu error per part deth PP e deth PSOE que non amie entà cap de lòc", hiegec Molins. Ath sòn conéisher, en procès de pacificacion en País Basc se hèn "fòrça, fòrça errors e pòt èster qu'ara fin toti mos hescam mau".

Molins tanben denuncièc era existència d'ua "manipulacion informatiua" perque, mentretant se da cubertura informatiua as atacs de grops violenti contra sedences o dirigents deth PP e deth PSOE, non s'a ex-

plicat que "s'a cremat batzokis (centres socials) deth PNB". En aquest sentit senhalèc qu'es mieis de comunicacion publicas "son es qu'an mès responsabilitat. Non ei pas bon que se manipule era informacion enquiad aqueth punt; non se'n trè arren de bon d'aquerò", afirmèc.

D'un aute biais, Molins se referic ath hèt que delàger eth PP catalan hesse pèrder tres votacions a CiU ena Comission de Politica Sociau deth Parlament catalan sus era construccion de geriatrias en Catalonha, sus es instruccions que cau balhar as centres sanitaris entà crompar medicaments e sus era dotacion d'un escàner tà un espitau de Berga (Barcelona). "Me vergonharie -assegurèc- èster deputat deth PP catalan perque jo vòti per conviccion, non en repòrt de çò que hèsque un aute grop en un aute Parlament". "Qu'ei un papèr plan pòc digne per part d'uns deputadi qu'en foncion de çò que hescam nosati en Madrid les desapareishen es conviccions; se ve que non deuen èster pas massa profundes", indiquèc.

DETIEN ARA EXPRESIDENTA D'UNIÓ DE JOVES PES PRESUMPTES IRREGULARITATS ENA CONSELHERIA DE TRABALH

Era expresidenta d'Unió de Joves ena província de Girona, Maria Creu Guerrero, siguec arrestada pera sua presumpta implicacion enes possibles irregularitats e tracte de favor en despartiment de mès de 23.000 milions de pessetes dera Generalitat e era Union Europèa per part dera Conselheria de Trabalh e de quauques empreses vinculades a Unió Democràtica de Catalunya.

Aquest qu'ei eth tresau arrèst que i a enes darrères ores per aquesta possibla fraude. Maria Creu Guerrero declarèc ager pendent ua ora deuant deth jutge de guàrdia de Girona, dempús d'èster detienguda ues ores abantes. Es autes dues personas

arrestades son administratiues deth grop Pallarols, deth quau Guerrero ei actuaument apoderada. Aquest grop ei format pes acadèmies CEIF, TEO e AND, que operen en Girona, Tarragona e Lhèida. Eth cas des presumptes irregularitats ena Conselheria de Trabalh se lheuèc en junh de 1997, maugrat qu'es testimoniis apareishudi enes darrères setmanes aurièn prebotjat es prumères detencions, pòc dempús qu'eth conselhèr de Trabalh, Ignasi Farreres, anoncièsse en Parlament er archiu dera prumèra denúncia que se presentèc per aquest cas, en Tarragona. Ena interlocutòria d'archiu, eth jutge afirmèc qu'auie trobat irregularitats administratiues mès non de penaus.

UA DEPUTADA DETH PP EN PARLAMENT DE CATALONHA CRITIQUE ETH BISBE DE VALÈNCIA PES SUES OPINIONS SUS ES HEMNES

Era portavotz adjunta deth Grop Popular en Parlament de Catalonha, Dolors Nadal, declarèc ager en Barcelona que "es drets des hemnes son tanben drets umans" e qu'eth bisbe de València, Agustín García, non semble aué-se'n dat compde.

Eth prelat affirme ena carta pastorau d'aguesta setmana qu'eth lòc ideau dera hemna ei en casa, en tot encuedà-se des hilhs e malauts e qu'aguesta serie era forma mès adequada d'acabar tamb era desaucupacion. Dolors Nadal afirmèc qu'aguestes paraules demòstren qu'era discriminacion per rason de genre encara existís ena nòsta societat e que cau contunhar trabalhant entà conciliar era vida familiara e laborau des hemnes. Segontes era portavotz deth Grop Popular, "eth bisbe de València s'aurie d'ocupar que non i auesse aquest tipe de discriminacion" e, contràriament ad açò, "trigue sonque era mieitat dera poblacion entà realisar un prètzhèt qu'a de hèr tota era familha".

"Eth Partit Popular tostemp li a autreat ua grana importància ara familha, mès açò non vò pas dèder qu'es hemnes siguen es soletes que s'encueden de tier compde des mainatges, es malauts e es vielhs", manifestèc Nadal. Ath sòn conéisher, "era hemna a trabalh d'ençà dera epòca des cavèrnes", maugrat qu'encara aué ei luenh de compartir tamb es òmes es responsabilitats en casa. Segontes Dolors Nadal, "cau auançar entà que se materialisen uns drets d'igualtat que ja son reconeishudi". Es paraules der avesque Agustín García, enes quaus s'affirme qu'era mestressa de casa "ei eth modèu mès perfectè de societat", desvelhèren eth refús des teològs progressistes.

CONCLUSIONS DETH COLLÒQUI OCCITANO-CATALAN CELEBRAT EN LHÈIDA

En Collòqui Universitat e activitat Transfronterera en Euroespaci Occitano-Catalan, celebrat ager en Lhèida, s'aprovèren es següentes conclusions:

men Alen, Antoni Rosell e d'auti responsables d'universitats europees, entara coordinacion des estudis occitans.

1) Individuar un hilat de docents e investigadors universitaris que, en diuèrsi païsi europèus, siguen interessadi en un programa de projectes curriculars, prepauses d'escambi (de professors e estudiants), iniciatiues entara realizacion de seminaris, escambis de projectes de recerca, còrsi, tèsis doctoraus, eca., sus tèmes occitans e catalans, ath delà de promòir era creacion d'ensenhaments lingüistics e de lectorats.

3) Sollicitar en brèu un màster europèu d'estudis occitans laguens deth programa europèu d'escambi universitari Sòcrates.

4) Un doctorat interdisciplinari qu'arremasse estudis sus Occitània e Catalonha.

5) Era creacion per part des regions occitanes d'un hons entath finançament de lectorats d'occitan que poguen integrar enes departaments corresponenti (Filologia Catalana, Filologia Romanica, eca.) aqueres universitats europees que desiren programar estudis de lengua occitana a nivèu academic e curricular.

2) Era creacion d'ua comission europèa universitària, integrada per: Fabrizio Beggato, Constanzo Di Girolamo, Enrique Monteagudo, Jesús Rodríguez Velasco, Ma Car

ERA CRISI DE KOSÒVO

ES ALBANESO-KOSOVARI SIGNEN ETH PROJÈCTE D'ACÒRD DE PATZ PREPAUSAT PETH GROU DE CONTACTE

Era delegacion albaneso-kosovara presenta enes negociacions de París sus Kosòvo signèn eth projècte d'acòrd de patz entara província sèrbia prepausat peth Grop de Contacte.

Era signatura se hec en Centre de Conferéncias Internacionaus (CCI) de París, a on se desvolopaven es negociacions sus Kosòvo d'ençà de deluns. Eth cap dera delegacion albaneso-kosovara, Hashim Thaçi, signèn eth document amassa tamb d'auti tres membres dera sua delegacion: Ibrahim Rugova, Veton Surroi e Rexhep Qosja. Atau madeish, en qualitat de testimoni, signèren tanben Christopher Hill, coma mejancèr pes Estats Units,

e Wolfgang Petritsch coma mejancèr pera Union Europèa. Eth tresau mejancèr, Boris Maïorski, non signèn eth document.

Es sèrbis, que refusen eth projècte d'acòrd, estimèren qu'eth document non a cap de valor se sonque ei signat pes albaneso-kosovari. Eth president sèrbi, Milan Milutinović, afirmèc eth darrèr dimarts en París qu'es albaneso-kosovari "vòlen signar ua causa que non existís", en tot suggerir qu'un acòrd sus Kosòvo non pòt pas auer ua existéncia reau se non ei aprovat enes madeishi tèrmes pes dues parts.

Ibrahim
Rugova



DOCUMENT

TÈXTE INTÈGRE DES COPRESIDENTS DERA CONFERÉNCIA DE PATZ SUS KOSÒVO EXPLICANT ER AJORNAMENT DES CONVERSÈS

Es ministres d'Ahèrs Extèriors de França e Reine Unit, Hubert Vedrine e Robin Cook, copresidents dera Conferéncia de patz sus Kosòvo, anoncièren er ajornament des discussions tamb eth següent tèxte:

1. Es acòrdi de Rambolhet constituïssen era unica solucion pacifica entath problèma de Kosòvo.

2. Aquesta oportunitat siguec profitada en París pera delegacion kosovara que confirmèc, tamb era sua signatura, eth sòn compromís en çò que hè ath conjunt d'acòrdi.

3. Luenh de profiter aguesta escadença, era delegacion iogoslava sagèc de qüestionar es acòrdi de Rambolhet.

4. En aqueres condicions, dempús de concertar tamb es nòsti sòcis deth Grop de Contacte (Alemanha, Estats Units, Itàlia, Rússia, Union Europèa e Presidéncia dera Organizacion entara Seguretat e era Cooperacion en Euròpa, OSCE) consideram que non i a cap de motiu entà contunhar es discussions en cors. Aguestes qu'an estat ajornades e non recomençaràn enquia qu'era part sèrbia expresse era sua adesion as acòrdi.

5. Començam ara seguida consultes tamb es nòsti associadi e aliats entà èster preparats entà actuar. Informam ath secretari generau dera OTAN. Demanam ara presidéncia dera OSCE que prengue es decisions de besonh tanhentes ara seguretat dera KVM (Mission de Verificacion en Kosòvo). Eth Grop de Contacte demore informat.

6. Avertim de manèra solemna as autoritats de Belgrad contra tota ofensiu militar en terren e quinsevolh travader ara libertat de movement e accion dera KVM que violè es compromisi adoptadi. Taus violacions auràn es mèis grèus conseqüéncias.

WASHINGTON DA UA SETMANA DE TÈRME A MILOSEVIC ENTÀ QU'ACCÈPTE ER ACÒRD DE PATZ ENTÀ KOSÒVO

Iogoslàvia empedegue eth pas pes carreteres entà esvitar qu'es observaires dera OSCE gesquen deth país

Milosevic sonque a ua setmana entà esvitar qu'era OTAN bombarde as sues tropes en Kosòvo. Washington vò deishà-li aguest tèrme ath president iogoslau abantes de recórrer ara fòrça, segontes a hèr saber eth lidèr dera majoria republicana en Senat, Trent Lott. Mentretant, era Organizacion entara Seguretat e Cooperacion en Euròpa (OSCE) evacuarà deman es sòns observadors de Kosòvo, pr'amor der agreujament dera crisi e eth petjorament dera seguretat ena província secesionista sèrbia.

Ath delà, er atac dera OTAN contra es objectius iogoslavs en Kosòvo semble cada còp mès a pròp. Inclús, eth senador nòrd-americain Joseph Biden a vaticinat qu'es bombardaments començaràn "plan lèu", pr'amor qu'ath sòn conèisher, eth lidèr iogoslau, Slobodan Milosevic, "non darà marcha endarrèr".

En tot preveir possibles dificultats, era OTAN a en Macedònia era nomentada "fòrça d'extraccion" integrada per 2.600 militars capables d'entrar en accion en dues o tres ores, segontes es sòns responsables.

Er anonci dera pròpleu evacuacion l'a hèt en Òslo eth president de tòrn dera OSCE e ministre noruèc d'Ahèrs Extèriors, Knut Vollebaek, qu'indiquèc qu'era decision sigue prenuda amassa tamb es sies païsi deth Grop de Contacte: Alemanha, EEUU, Rússia, Reine Unit, França e Itàlia.

Eth Departament d'Estat nòrd-americain manifestèc delàger era sua inquietud deuant eth hèt qu'es tropes sèrbies auessen plaçat barricades tamb blòcs de hormigon enes carre-

tères pes quaus aurien d'èster evacuadi es observadors. Ath madeish temps, es inspectors internacionaus s'auien queishat darrèrament des contunhadi trebucs que metien ath sòn trabalh autant sèrbis com albanesikosovars.

Amassada en Washington

Mentretant, en Washington, s'amassen es principaus dirigents deth Congrès tamb eth president Clinton e seguís era evacuacion dera ambaishada d'Estats Units en Belgrad. "Auem de contunhar, tau com mos auem comprometut, tamb ua campanha de bombardament", declarèc Biden, entà qui, senon ei atau, i aurà ua auta ofensiu militar sèrbia contra Kosòvo e tamb "detzenats de refugiadi, era region demorarà desestabilizada".

Ena amassada, Clinton non presentèc cap de calendari sus quan començaràn es operacions, senon qu'explicuèc es motius que hè de besonh es atacs aèris entà forçar es sèrbis a acceptar e signar eth plan de patz internacionau entà Kosòvo.

Biden ei partidari de que Clinton explique ath país es motius que pòden hèr besonhós intervien en Kosòvo, tamb era demana d'un vòt d'empara en Congrès, sustot en saber qu'ei reau eth risque qu'age baishes umanes. Era amassada entre Clinton e es 31 membres mèis destacadi des dues cambres deth Congrès se celebre pera demana deth lidèr dera majoritat republicana en Senat, Trent Lott, eth quau manifestèc dijaus qu'auie de besonh mèis informacion entà determinar se ua intervencion en Kosòvo ei besonhosa entàs interressi nacionaus d'Estats Units.

CINE EN VIELHA: QUÉDATE A MI LADO (STEPMOM)

Ei era istòria de dues hemnes, Isabel e Jackie, que s'òdien mutuament, de dus hilhs, Anna e Ben, que se trapan en miei der enfrontament, e d'un marit, Luke, que sage de suberviuèr. En tot que Jackie ei era mair perfècta, Isabel non ei sonque ua madrastra que jamès volec èster mair, e aquerò provòque conflictes. Ei ua istòria dera vida reau, plia de tendressa e passion, ena quau se despartissen es alegries e es penes en ua familha ben normau; ua istòria ena que toti es sentiments entren en jòc enquia arribar a l'imits insospitadi.

22.30 ores

Isabel JULIA ROBERTS, Jackie SUSAN SARANDON, Luke ED HARRIS, Anna JENA MALONE e Ben LIAM AIKEN.

Direccion CHRIS COLUMBUS Guion RON BASS, GIGI LEVANGIE, JESSIE NELSON, STEVE ROGERS e KAREN L. HOPKINS Produccion WENDY FINERMAN, MARK RADCLIFFE e MICHAEL BARNATAN Fotografia DON McALPINE Vestuari JOSEPH AUSILI Editor NEIL TRAVIS Dessenh produccion STUART WURTZEL

